

Ette olla verkostokoti

Att vara nätverkshem – översättning till meänkieli



Joskus ko lapsi ei saata asua kotona vanhuuksitten tykönä se saattaa olla parasta lapselle ette se siirethään ashuun sukulaisen elikkä muun likhiisen työ, niin sanotussa verkostokoissa. Verkostokoti on yhen sorttinen perekoti jotako tutkithaan ja jollekko sosiaalipalvelu antaa tukea.

Perekoti

Yksityinen koti joka ottaa vasthaan lapsia vakituiselle hoijole ja kasvatukselle tehtävännä sosiaalilautakunnalta.

Verkostokoti

Perekoti jossako oon yks elikkä useampi sukulainen elikkä muita likhiisiä.

Sukulaisia

Esimerkiksi mamman- elikkä papan vanhuukset, siskot, musterit ja enot elikkä fasterit ja seät lapselle.

Likhiiset

Esimerkiksi lapsen ja lapsen perheen kaverit ja krannit elikkä henkilökunta lapsen koulussa elikkä esikoulussa.

Lapset jotka ei saata asua heän vanhuuksitten tykönä

Usseimat lapset Ruottissa saavat heän tarpheet tyytytetyksi ja elävät turvalisesti ja hyvin yhdessä heän vanhuuksitten kansa. Mutta vissile lapsile se saattaa olla tarpheelista ette asua muussa koissa jos tilane oon semmonen ette vanhuukset ei saata antaa lapselle sitä hoitoa ja turvalisuutta jotako lapsela oon oikeus saaja. Semmosissa taphauksissa se oon sosiaalipalvelu kunnassa jossako lapsi assuu jollako oon vastuu ette lapsi siotethaan oman koin ulkopuolele.

Sosiaalipalvelu pittää ensi siassa hunteerata jos joku sukulainen elikkä muu likhiinen saattaa ottaa vasthaan lasta, niin sanotussa verkostokoissa. Ajatus verkostokoin kansa oon ette lapsi saattaa pittää jäljelä sen turvalisuen joka oon suhtheissa ja kontaktissa oman alkuperän ja luonolisen verkoston kansa.

Tekiänoikeuslaki suojaa tätä julkasua. Ko tätä siteraa niin pittää antaa lähtheen. Ette jäljentää kuvia, valokuvia ja piirustuksia vaaithaan lupa tekiältä. Julkasu oon pdf:inä Sosiaalihallituksen webbipaikala.

Julkasua mennee kansa ottaa esile vaihtoehtosissa muotoissa tahon mukhaan. Kysymyksiä vaihtoehtosista muotoista lähätethään osotheeseen: alternativaformat@socialstyrelsen.se

Artikkelinnumero 2023-3-8432
Valokuva: Christian Ferm, Scandinav

ETTE OLLA VERKOSTOKOTI
SOSIAALIHALLINTO

Sosiaalihalinto tekkee aina arvioinikin mikä on paras lapsele yksityisen lapsen tilantheen mukhaan. Monesti se on parasta lapsele ette asua heän likhiisitten kansa mutta vississä taphauksissa se on parasta lapsele ette asua verkoston ulkopuolela. Silloin lapsi saattaa saaja apua sosiaalipalvelulta ette pittää yhtheyen hänen verkoston kansa muula laila.

Tutkimus verkostokoista

Jos sukulainen elikkä likhiinen halvaa ottaa vasthaan lapsen hänen koissa sosiaalipalvelu pittää tutkia etelytyksiä sille samhaan laihiin ko muita perekotia tutkithaan.

Tutkimus pittää muun muassa sisältää

- perheen elämistilane, asuminen ja likimiljöö
- perejäsenitten henkilökohtaset etelytykset, ominaisuuet ja huoltokyky

Sosiaalipalvelu tarttee kansa saaja sisäle tietoja ajatetuista perekotivanhuuksista eri rekisteristä, esimerkiksi sosiaalipalvelun omasta rekisteristä ja Polisiviraston eppäily- ja rasitusrekisteristä. Sosiaalipalvelu saapii noutaa vissiä tietoja vain jos perekotivanhuukset suostuvat siiheen.

Sosiaalipalvelu pittää kansa tarkasti seurata ylös ette lapsela on hyvin siinä koissa mihinkä se on siiretty. Sen takia lapsen sosiaalisekreteerari käypi säänlisesti lapsen ja perheen tykönä jossako lapsi assuu, sinä aikana ko siirto kestää.

Perekoin tehtävä

Ko lapsi siirethään perekothiin huoltajalla, sosiaalipalvelulla ja perekoila on jaettu vastuu ette tyytyttää lapsen tarvetta huolosta, turvalisuuesta, kasvantista, perhäänkattomisesta ja valvonasta. Perekoila pittää sen takia olla likhiinen yhteistyö niin sosiaalipalvelun ko lapsen huoltajan kansa.

Ette olla perekoti saattaa välistä olla semmosta ko ette

- rakentaa ylös turvalisen, rakhauelisen ja kehittävän suhtheen lapsheen
- eesauttaa ette lapsela on hyvä olemassaolo
- auttaa lasta koulunkäynin kansa, esimerkiksi läksynlukemisen kansa ja ette käy vanhuuskokkoksissa
- eesauttaa ette lapsi saapii terhveys- ja saihraanhoitoa ja hammashoitoa
- antaa tukea lapsele kontaktissa perheen ja kaveritten kansa
- olla yhtheistyössä lapsen huoltajan kansa niin arkipäiväsistä asioista ko suuremista asioista niinku esimerkiksi ko valittee koulun
- olla yhtheistyössä sosiaalisekreteerarin ja muitten professunellitten kansa ette tyytyttää lapsen tarpheita.

Tuki ja koulutus

Kaikila perekoila, ja kansa verkostokoila, oon oikeus saaja tukea ja koulutusta ette saaja maholisiiman parhaat etelytykset ette ottaa halthuun lasta. Tukea mennee muotoila erilä laila. Sitä saattaa esimerkiksi antaa yksityisen kontaktin kautta käsitteliän kansa sosiaalipalvelussa elikkä ohjauksen kautta, niin yksityisesti ko ryhmässä.

Tukea tarttee muotoila suhtheen mukhaan mikä lapsela oon verkostokoin kansa. Mamman ja papan vanhuuksilla saattaa esimerkiksi olla tarve muuta tukea ko lapsen entisellä opettajalla. Se saattaa kansa olla niin ette tukitarve muuttuu siotuksen aikana.

Korvaus

Perekoila oon oikeus korvauksheen ko lapsi siirtyy sisäle heän työ. Korvaus verkostokoile seuraa samoja suositteluja ko mitä Ruottin Kunnila ja Rekiuuniila (SKR) oon muile perekoile. Suosittelut ei ole sitouttavat mutta joka kunta päättää itte mitä korvausta annethaan. Korvausta saatethaan muuttaa aijan olhoon ko lapsi oon perekoissa koska olosuhtheet saattavat muuttua, niinku esimerkiksi lapsen ikä elikkä tarpheet.

Lue lissää perekoin tehtävästä osotheela: socialstyrelsen.se/mininsats.

